

ЎЗНОМА
1930 ЙИЛ
12 МАЙДАН
ЧИҚА
БОШЛАГАН



Таштас

ЎЗБЕКИСТОН ССЖ ИИВ ҲАЙЪАТИ НАШРИ

№ 58—59 (2322—2323) 1991 ЙИЛ 21 МАЙ СЕШАНБА БАҲОСИ 20 ТИЙИН

БИЗГА ЖАВОБ БЕРАДИЛАР

КЎРСАТМА БЕРИЛИБДИ-Ю...

Ўзномамизнинг муҳтарам ихлосмандлари! Шу йил 2 март кунини эълон қилинган «Қонун кучлими ёки буйруқ?» сарлавҳали мақоламиз нима ҳақда эканлигини эсладингизми?

Унда Тошкентдаги «Жанубий» темир йўл вокзали хизматчилари милиция ходимларига навбатсиз чипта олиш имкониятини яратмаганликлари тўғрисида ёзилганди. Ҳатто уларнинг баъзилари ўтган йил 31 октябрь кунини қабул қилинган «Милиция ходимларини ижтимоий ва ҳуқуқий жиҳатдан ҳимоялашни кўчатириш тўғрисида»ги УЗССЖ қонунини бажариш бўйича ўз раҳбарларидан буйруқ олмаганликларини айтишган. Шу боис, темир йўл хизматчиларининг ғайриодатий манманликлари тўғрисидаги мақоламизни «Қонун кучлими ёки буйруқ?» деб номлагандик.

Нижоят, Октябрь революцияси орденли Урта Осиё темир йўл бошқармаси йўловчилар хизмати бошлигининг ўринбосари И. Файзуллаев им-

зо чеккан юқоридаги жавоб хатини олиб, икки ҳисса қувондик.

Икки ҳисса деганимизнинг сабаби шундаки, биринчидан, мазкур бошқарма раҳбарияти ўзномамиз чиқиши муносабати билан Президентимиз имзо чеккан қонунни «кўриб» чиқибди.

Иккинчидан, Ўзбекистон ССЖ ҳузуридаги барча темир йўл вокзали ва станцияларида милиция ходимларини навбатсиз чипта билан таъминлаш бўйича кўрсатма берилибди.

Лекин шу ўринда яна иккита нарса туфайли қувончимизга дарз кетди. Биринчидан, ўртоқ Файзуллаев «Президентнинг 1991 йил 31 октябрдаги Фармони»ни (!) кўриб чиқдик, деяпти. Ё, алҳазар!..

Иккинчидан, соф ўзбек тилида чоп этилган танқидий мақолага ўзбек миллатига мансуб раҳбарнинг рус тилида жавоб йўллаганига нима дейиш мумкин? Қарийб 2 йилдан бери амал қиладиган давлат тили ҳақидаги қонун қачон уларга етиб бораркан?



«ИЧКИЛИКБОЗЛАР ЭҲТИЁТ БЎЛИНГ!»

Андижон вилояти ИИБ давлат автомобиль назоряти бўлими ходимлари йўл-транспорт ҳодисалари олдини олиш мақсадида катта тадбирларни амалга оширишмоқда. Рулни маст ҳолатда бошқариш қатнов жадал йўллардаги оғир фалокатларни келтириб чиқариши мумкинлиги ҳисобга олиниб, наркологик диспансер билан ҳамкорликда кўчма пост ташкил этилди.

ДАН ходимлари шу йилнинг биринчи чорагидаёқ кайф гаштини машинада сурши ишқибозларидан 1372 нафарини аниқлашди.

СУРАТЛАРДА: ҳушёрлиги шубҳа уйғотган ҳайдовчи

автобуска таклиф қилинмоқда; милиция старшиниси Пўлатжон Сиддиқов ва диспансер ходими Шавкатжон Бузурхоновлар енгил машина рулини маст ҳолатда бошқарган ҳайдовчининг текширишдан ўтказишмоқда.

Гулномжон УБАЙДУЛЛАЕВ олган суратлар.

ГАРАЖДАГИ «ОМБОРХОНА»

Гулсара опанинг ниятлари катта эди. Афсус, улар амалга ошмай қолди. Тўрт минг сўмга яқин пул ҳазил гапми! Унинг устига қўни-қўшнларининг муомаласини айтмайсизми. Қанча эҳтиёт бўлмасин, барибир чув тушиб қолди. Атанг, ёмон иш бўлди, милиция ҳалақит бермаганида...

Шу йил 23 апрель кунини Пахтакор тумани ички ишлар бўлимига Акмал Иромонов давлат хўжалигидан қўнғироқ қилишиб, маълумот беришди. Дарров опергуруҳ ташкил қилиниб, унга туман ИИБнинг ВХСС оператив вакили, милиция капитани Ҳикмат Усмонов, участка вакили Ёрдамчиси, милиция сержанти Сафар Ажаоновлар юритилди. Милиция ходимлари кўнгилли халқ дўстлари билан биргаликда ушбу хўжалик марказидаги Завод кўчаси, 4-уйга етиб келишди. Хо-

АКС-САДО

ГАПНИНГ ОЧИҒИ

Ҳурматли ўзнома муҳарририяти! «Постданнинг шу йил 14 май сониде милиция майори Акмал Комиловнинг «Йўл солиғи олинмас» мақоласидаги таклиф айни вақтида ўртага ташланган деб ўйлайман. Гапнинг очғини айтганда ходимларнинг кўпчилиги ўз шахсий автомобилларидан иш вақтидан ташқари байрам ва дам олиш кунлари ҳам хизмат вазифасини бажаришда фойдаланадилар. Ва бунда ИИВ томонидан эҳтиёт қисмлари туғул, ёнилиги ҳам берилмайди. Шахсан менинг ўзим машинада хизмат юзасидан айрим кунлари 80-100 километрдан ошиқ йўл юраман.

Ахлоқ тузатиш муассасаларининг деярли барчаси Тошкент вилоятининг чекка қисмларида жойлашган. Таъминот ва бошқа масалаларни ҳал қилиш юзасидан эса Тошкентдаги турли корхоналарга мурожаат этишга тўғри келади.

Шунинг учун ҳам мен А. Комиловнинг таклифини қувватлайман. Агар бу таклиф инobatга олиниб, ички ишлар ходимлари автомобилларига солинадиган йўл солиғидан озод этилса, нур устига нур, ички ишлар ходимлари ишини рағбатлантиришнинг аъло намунаси бўларди.

Эрнин ЯУЛДОШЕВ, ички хизмат капитани.

СССР ТЕМИР ЙЎЛЛАР МИНИСТРЛИГИ
ОКТАБРЬ РЕВОЛЮЦИЯСИ ОРДЕНЛИ
УРТА ОСИЕ ТЕМИР ЙЎЛ БОШҚАРМАСИ
700060, Тошкент, Т. Шевченко кўча, 7

МИНИСТЕРСТВО ПУТЕЙ СООБЩЕНИЯ СССР
УПРАВЛЕНИЕ СРЕДНЕАЗИАТСКОГО ОРДЕНА
ОКТАБРЬСКОЙ РЕВОЛЮЦИИ ЖЕЛЕЗНОЙ ДОРОГИ
700060, Тошкент, Т. Шевченко, 7

12.04.91г. № ЛВ-42
На №

Редакция газети "Постда" на публикацию материала "Қонун кучлими ёки буйруқ?"

Материал опубликованный в вашей газете от 2 марта 1991г. одновременно с Указом Президента от 31 октября 1991г. рассмотрен пассажирской службой.

Дано указание по дороге обеспечить право работников милиции на внеочередное приобретение билетов во всех билетных кассах вокзалов и станций Узбекской ССР.

Заместитель начальника пассажирской службы И.Н. Файзуллаев

ШУ СОНГА ХАБАР

ХАЛҚ БИЛАН УЧРАШУВ

Пойтахтдаги Ленин комсомолни номли маданият ва истироҳат боғида Ўзбекистон радиоси «Сўнги ахборот» бош муҳарририяти «Оқшом тўнқинларида» Ахборот-Мусиқий эшиттириши ижодий ходимларининг меҳнатқошлар билан учрашуви бўлиб ўтди.

хурият прокуратурасининг бўлими мудирни адлия маслаҳатчиси Файзулла Қиличев, филология фанлари доктори, профессор Абдузхур Абдуазизов, журналистлар Эркин Худойбергенов, Баҳром Усмонов ва бошқалар ташириф буюришди.

Халқ билан бевосита дилдан чиқариб мулоқот қилиш, уларнинг фикрини билиш, саволларига жавоб бериш учун жумҳурият ички ишлар вазирининг ўринбосари генерал-майор Гафур Раҳимов, жум-

Бугунги қайта қуриш, демократиялаш даврининг ўткир муаммолари ҳақида туғилган фикрларини Собир Раҳимов тумани «Алоқа» маҳалласи кўмитаси раиси, меҳнат фахрийси Аҳмаджон ака Умар-

қулов, ТошДД журналистика куллиёти 3-курс толиби Сафар Мўминов, Янгийўл туманидан Мирза Толипов ва бошқалар баён этишди, уларга ҳуқуқ-тартибот ходимларидан жавоб олишди.

Учрашув қатнашчиларини халқнинг севимли хонандалари Комилов Баратов, Озода Назарова ҳамда Абдулхайжон Каримов ўзларининг дилрабо кўшиқлари билан мамнун этишди.

Бундай ибратли учрашувлар Ўзбекистон радиосининг турли муҳарририятлари ижодкорлари томонидан кеч кузгача уюштириб борилади.

Ҳабибулла ШОДИЕВ, «Постда» муҳбири.

М. АБДИЕВ.

ДОВОНДАГИ УЧРАШУВ



Офтобнинг заррин нурлари юксак тоғлар ортидан элас-элас кўриниб турибди. Ҳавонинг авзойи тунд. Майин эсаётган тоғ шабодаси кишининг баҳри-дилига ором бахшида этади. Кечроқ бўлсада қийғос очилган дарахтларнинг кўрки табиатнинг ҳуснига ҳусн қўшади. Тоғ ёнбағриларидаги бундай кўркам манзарани фақат фаслар келинчаги — баҳорда кўриш мумкин. Бироқ мақсади-миз баҳор табиатини мадҳ этиш эмас. Балки ана шундай гўзал манзаралар қўйнида ўз хизмат бурчини ўтаётган ДАН ходимлари ҳақида ҳикоя қилиш...

Бир томондан олиб қаралганда «Довонда ДАН постига нима бор?» деган фикр хаёлга келади. Аслида эса бошқача. Чунки йўлнинг пасту баландликлари, хавфли бурилишлари ҳар бир кишини бироз бўлса-да толиқтиради. Ана шундай вақтда ҳайдовчиларни сергак тортириш мақсадида, уларни йўлдаги хавф-хатарлардан воқиф қилиш учун ҳам ДАН ходимларининг пости довонда керак. Бундан ташқари, ҳозирги жамиятнинг, инсонларнинг иқтисодий жиҳатдан танг аҳволдалигини инobatга олиб, ўзга жумҳуриятларга ноёб молларни олиб ўтиш ман этилган.

Ана шу ҳодисаларнинг олдини олиш мақсадида Тошкент — Қўқон довоида, ҳам ДАН пости фаолият кўрсатмоқда.

Ҳамроҳим бироз сергак тортиб:

— Ҳозир бизни ҳам тўхтатишади. — деди.

Дарҳақиқат, постга яқинлашишимиз билан бизни баланд бўйли, милиция кийимидаги (кейинчалик билсак, милиция сержанти, ИПХ ходими Олимжон Йўлибоев экан) йигит тўхтатди. Унга итоат қилиб, машинани чеккага олдик. Ҳужжатларнинг бариси ўз жойида эканлигига ишонч ҳосил қилгач, Олимжон:

— Йўлингиз бехатар бўлсин, — дея қўлини чаккасига олиб борди.

Йўл назорати хизматчиларининг бу йўсин мулойимлик билан муомала қилишларини (тўғриси айтсам) биринчи бор кўришим. Ҳаттоки, доимо йўлда юрувчи дўстим: «Ахир мана шундай назоратчилар ҳам бор эканку», — деди. Назоратчиларнинг ана шундай фаолияти мени бефарқ қолдирмади. Яхшики, ўзим билан фотоаппаратим бор экан, дарров енг шимариб, ишга киришдим. Аввало ноёб молларни ўзга жумҳуриятларга олиб

кеттиш ҳоллари юз берган ҳодисалар билан қизиқдим. Булар ҳақида Поп тумани ИИБ ДАН инспектори милиция старшинаси Ҳидоятулла Ҳабибуллаев шундай маълумотларни берди:

— Аввало шунга айтиш керакки, ноёб молларни олиб кетиш ҳоллари кейинги пайтларда анча қисқарди. Деярли икки ой мобайнида бу ҳол бир-икки мартаба такрорланди. Масалан, номаълум бир машина тўхтатилиб, текширилганда, унинг юки 170 метр қимматбаҳо газлама (парча) эканлиги аниқланди. 9 апрель куни К. Толжаков бошқараётган Қозғистон жумҳуриятига қарашли «ММЗ-554» белгили, 06-28 КЗИ рақамли автомашина текширилганда, 2 қўти чой, 2 қўти макарон, 2 қўти печенье каби маҳсулотлар топилди. Машина эгаси бу маҳсулотларни Андижон шаҳридан олиб кетаётганлигини айтди. Бу молларнинг барчаси тегишли идораларга топширилди.

Шу пайт постга Л 33-56 ФЕ рақамли енгил автомашинаси келиб тўхтади. Машина текшириб кўрилганда, унинг юкхонасидан «Витязь» рангли телевизорни чиқди. Машина эгаси А. Қўзибоевнинг таъқидлашча, у бу телевизорни Тошкентда

истиқомат қиладиган бир қариндошига совга учун уч ой бурун олган экан. Фаргона шаҳридаги тижорат дўконларининг биридан олинган бу телевизорга дўконнинг лоқайд сотувчилари ҳисоб-китоб ҳужжатларини беришмаганмиш. Албатта, бундай ҳолларни назоратчилар ҳисобга олишади...

Шу куни биз назоратчилар билан бир неча соат бирга «меҳнат» қилиб, уларнинг хизматлари нақадар оғир, машаққатли эканлигига иқрор бўлдик. Кетар пайтимиз яқинлашиб, машинага ўтирилаётган дақиқада Поп тумани ИИБ ДАН бошлиги милиция майори Алхар Ғоипов ва ДАН ходими милиция лейтенанти Қобилжон Аҳмедовлар келиб қолишди. Байрам кунлари бўлгани учун улар барча постларни текшириб юришганини айтишди. Назоратчилар билан яна бироз суҳбатлашгач, йўлга тушдик. Яна бизни юқорида таърифланган манзара ўз бағрига олди.

Дилшод ЖАЛОЛОВ,
журналист.

СУРАТЛАРДА: довондаги ДАН пости ходимларининг хизмат фаолиятлари-дан лавҳалар.

Муаллиф олган суратлар.

ХОТИРА

АЙРИЛИК

Бугун барча ёр-биродарлар, фарзандлар ва маҳалладошларнинг кўзларида ёш. Чунки улар ўзларининг энг яқин кишиси — Умаралини сўнгги йўлга кузатмоқдалар. Одамлар боши узра кўтарилган тобут охида тебранганича қабристон томон яқинлашиб боради...

Во дариг, кечагина юздан табассум билан навбатдаги иш режаларини амалга ошириш учун хизматхонасига кириб келган бу ажойиб инсон умрининг сўнгги кунини яшаётганлиги кимнинг ҳам хаёлига келибди дейсиз. Афсуски, ўлим вақт ва жой танлаб ўтирмас экан.

Умарали Мажидов эндигина 44 баҳорни қаршилаган эди. Тожикистоннинг Кулоб шаҳрида дунёга келган бу йигит ёшлик йилларидаёқ ота касбига меҳр қўйган. Унинг отаси Тожибой ака комсомоллик даврида халқ озодлиги учун курашганлардан бири. У Иброҳимбек кўрбошнинг қўлга олишда шахсан иштирок этган. Кейинги йилларда эса ички ишлар соҳасида раҳбарлик лавозимларида ишлаган.

Умарали Мажидов умрининг охиригача касбини эъзозлаб келди. У Тошкент давлат дорилфунунини тугаллагандан сўнг хизматини Наманган шаҳар ички ишлар бўлимида бошлади. Жиноят қидирув бўлимида катта оператив вакил бўлиб ҳам ишлади. Бир қанча жиноятчиларни қўлга туширганлигидан ташқари кўп қонунбузарликларнинг олдини олган. Айни кунларда эса Умарали терговчи вазифасида ишлаётган эди.

Милиция майори У. Мажидов бутун фаолиятини ҳуқуқ-тартибот ишларини мустаҳкамлашга, фуқароларнинг қонуний манфаатини ҳимоя қилишга сарфлади.

Унинг камтарин хизматлари раҳбарият томонидан муносиб баҳоланди. ЎзССЖ ички ишлар вазирлиги ва вилоят ИИБ бошлигининг мақтов ёрлиқлари билан тақдирланган. Кўксини бир қанча медаллар безаб турарди. Афсуски шундай дўстимиз қутилмаган автофалокат сабабли фожеали ҳалок бўлди.

Унинг сўнмас хотираси доимо ҳамкасблари ва яқинларининг қалбида сақланиб қолади.

Неъматжон МАМАЖОНОВ.

ҚОЧОҚ ҲАЙДОВЧИ

Шу йилнинг 11 апрелида Яккабоғ тумани ИИБ ходимлари БХСС опервакили милиция капитани Маҳмасоат Жўраев, ДАН инспекторлари милиция старшинаси Тўйчи Бегимов, милиция катта сержанти Марат Маҳматқуловлар Энгельс номли жамоа ҳўжалиги ҳудудида рейдда юришганди. Қарши шаҳри томонидан катта тезликда келаётган юк машинаси уларнинг эътиборини тортиди. Ҳайдовчи тўхташ ишорасини писанд қилмасдан ўтиб кетди. Дарҳол машина орқасидан тушилди.

«Партия XXIV съезди» жамоа ҳўжалиги ҳудудида у тўхташилди. Шаҳрсабаздаги «Эскиангорканал» курилиши ташкилоти ҳайдовчиси Тўлқин Остонов «ГАЗ — 52» белгили 73-40 КФМ рақамли машинасида 3500 дона ҳўжалик совуни олиб кетаётганлиги аниқланди.

Камёб мол туман матлубот жамияти омборига топширилди. Т. Остонов эса ўз қилмишига яраша жазосини олди. Баҳридин АЛИҚУЛОВ, Яккабоғ тумани ИИБ бошлигининг ўрнибосари, милиция капитани.

ЭЛ ОЛҚИШЛАГАН ЙИГИТ

Баходир Пўлатов ўз хонасида бугунги ишларни режалаштириб ўтирганди, эшик шадд очилиб, ранглариди қон қолмаган ўрта ёшлардаги киши кириб келди.

— Ука, ўғри, уйимга ўғри тушибди, — деди у саломлашишни ҳам унутиб.

— Шопилмасдан гапиринг-чи, воқеа қачон юз берди? Нямалар ўғирланибди?

— Кечқурун кеннойингиз бетоб онасини кўргани кетувди. Мен эса тунги сме-надаги ишга. Эрталаб уйга қайтсам, эшик қулфи бузилган. Ичкарига кирсам, ҳаммаёқ алғов-далғов. Тўйга деб йигиб қўйган кийим-ке-чаклар, жамгарган озгина пулимиз жойида йўқ.

— Гумонларингиз борми?

— Аниқ бир нарса дея олмайман.

— Шундоқ денг, ташвиш-ланманг. Ўғрини топамиз, ака. Албатта нарсаларингиз қайтарилади. Ҳозир тўғри уйингизга кетаверинг. Биз махсус қидирув гуруҳи билан етиб борамиз.

Шундан сўнг катта участка инспектори Баходир Пўлатов ходимлар билан дарҳол Ленин номли кўчада яшовчи Турсунбой Абдуллаев хонадонига етиб келди. Сивчилаб атрофни кўздан кечаришди. Оёқ ва қўл из-ларидан кўчирмалар олишди. Шу тариқа қидирув иш-лари бошланди. Гумондор шахслар жамоа фаоллари

билан суҳбатлар ўтказилди. Фикрлар олинди. Ниҳоят ўғри топилди. У туман мар-казидаги Наманган кўчасида истиқомат қилувчи, ҳеч қа-ерда ишламайдиган Анбара-ли Қосимов деган кимса экан. Жиноятчи қилмишига иқдор бўлди. Иши терговга оширилди. Ўғирланган пул ва буюмлар эгасига қайта-рилди.

Турсунбой Абдуллаев ўзида йўқ хурсанд эди. Ҳая-жондан кўзларига ёш кел-ди.

— Раҳмат ука, бу яхши-лигингизни умрбод унутмай-ман. Худо ҳамиша омадин-гизни бераверсин!

— Ҳечқиси йўқ ака, биз ўз бурчимизни бажардик, холос.

Биз Наманган вилояти Тўрақўрғон тумани ички ишлар бўлими катта участ-ка инспектори мили-ция майори Баходир Пўла-товнинг кундалик иш фа-олиятдан бир лавҳа келтир-дик. Унинг хонасига ҳар ку-ни турли касбдаги кишилар ҳар хил юмушлар билан ке-либ туришади. Биров эри-нинг ичкиликбозлигидан ва оилага моддий ёрдам кўр-сатмаётганлигидан шикоят қилса, иккинчиси жанжал-каш қўшнисидан нолийди. Хуллас унинг ҳузурига ке-лувчи ҳар бир кишининг ўзига яраша ташвиши бор. Кишиларнинг юрак дардла-рини тинглаш, уларни ило-жи борича ижобий ҳал этиш Баходирнинг одатий ишига айланиб қолган. Шунинг

учун ҳам у хизмат қилаёт-ган участка ҳудудида исти-қомат қилувчи аҳоли мили-ция майорининг дилкашли-гию топқирлигидан, хушёр-лигию мардлигидан беҳад мамнун.

Баходирда милиция ишига қизиқиш мактабда ўқиб юр-ган кезларида пайдо бўлган-ди. Армиядан қайтиб келгач, Тошкент ўрта махсус мили-ция мактабига ўқишга кир-ди. Уни муваффақиятли ту-галлагач, Қосонсой тумани ички ишлар бўлимида участ-ка инспектори бўлиб иш бошлади. Ўз касбига меҳр қўйиб, сидқидилдан хизмат қиларди. Кун сайин малака-си ортиб борарди-ю, аммо билим савияси пастроққа ўх-шаб кўринарди. Чунки ҳам-касбларининг кўпчилиги олий маълумотли бўлиб, ҳар томонлама тажрибали шах-слар эди. Қолаверса, давр ҳам олий маълумот олишни тақозо қиларди. Шу боис ишлаб чиқаришдан ажрал-маган ҳолда жумҳуриятимиз пойтахтидаги олий милиция мактабига таҳсил олди. Олий маълумотли ҳуқуқшунос дипломига эга бўлди.

Уч йилдири, Баходир Тўрақўрғон тумани ички иш-лар бўлимида хизмат қил-моқда. У иш бошлаган даст-лабки кунлардаёқ ўзига биркирилган участка ҳаёти-ни чуқур ўрганди. Аҳоли билан яқиндан танишди. Меҳнатсеварлиги, фидойи-лиги, кишилар билан тез тил топа олиши туфайли эл ҳурматини қозонди. У жино-



ятчиликнинг олдини олиш учун барча билим ва тажри-баларидан фойдаланади.

— Баходир Пўлатов ўзи-га ҳам, қўл остидаги ходим-ларга ҳам ўта талабчан. Шу-нинг учун у раҳбарлик қила-ётган участкада жиноятчи-лик йилдан-йилга камайиб бормоқда. Бу йил ўтган йил-га нисбатан 20 фоизга қис-қарди, — дейди туман ИИБ бошлиғи, милиция подпол-ковниги Маҳмуджон Тожи-боев.

— Асосий мақсадимиз имкон борича жиноят содир бўлишига йўл қўймаслик. Лекин ҳуқуқбузарлик юз берса, дарҳол уни фош этиш, — дейди Б. Пўла-тов. — Бир мен эмас, барча ҳамкасбларим ҳам уни яна-ям тезкорлик билан бажари-шимиз мумкин. Аммо бунга етарли шароит йўқ. Бўли-мизда техника таъминоти кўнгилдагидек эмас. Борла-ри ҳам аллақачон вазифаси-ни ўтаб бўлган. Чет эл по-лициялари компьютерлардан фойдаланишмоқда. Биз эса

ҳамон ундай техникалардан фироқдамиз. Ҳеч бўлмаса замонавий жиҳозларга эриш-сак, ишимизда анча олға силжиш бўлар эди.

Баходир самарали хизмат-лари учун жумҳурият ички ишлар вазирлигининг, вило-ят ва туман милициясининг қатор мукофотлари билан тақдирланган.

Мабодо йўлингиз тушиб, Тўрақўрғон шаҳри маркази-даги жамоат тартибини сақ-лаш таянч пунктига кириб қолсангиз, сизни милиция майори формасидаги хуш-чақчақ, самимий йигит қар-ши олади. У қаҳрамонимиз Баходир Пўлатовдир.

Тоҳиржон АКРАМОВ,
Тўрақўрғон тумани
ИИБ ходими, милиция
капитани.

Суратда: милиция майори
Б. Пўлатов кўнглили халқ
дружиначиси С. Абдуллаев
билан навбатдаги ишни ре-
жалаштирмоқда.

Муаллиф олган сурат.



САДОҚАТЛИ ЁРДАМЧИЛАР МУСОБАҚАСИ

Жумҳурият ИИБ жиноят қидируви таркибдаги кичик инспектор-кинологлар мусо-бақасига яқун ясалди.

5 кун давом этган бу кў-рикда Тошкент шаҳар, Бу-хоро, Самарқанд, Андижон, Наманган, Фарғона, Хоразм ва Тошкент вилоятлари иж-роия кўмиталари ИИБлари-дан ҳамда Қорақалпоғис-тон Шўро жумҳурияти ИИБдан 10 та команда ишти-рок этди. Улар ўзларининг хизмат итлари билан турли тўсиқлар майдонидан ўтиш-ди. Сўнгра кинологлар ит-ларнинг ҳид сезишини на-мойиш этишди.

— Кичик инспектор-кино-логларнинг хизмат кўп ку-раши бўйича шахсий-коман-

да мусобақаси яқунларига кўра, — дейди мусобақа бош ҳаками, жумҳурият ИИБ ходими милиция капи-тани Борис Якушкин, — Тош-кент шаҳар ижроия кўмита-си ИИБ вакиллари биринчи ўринни, 2-ўринни Хоразм вилояти ижроия кўмитаси ИИБ, 3-ўринни эса Тошкент шаҳар ижроия кўмитаси ИИБнинг 2-командаси эгал-лади.


Шахсий биринчиликда шох-супага Тошкент шаҳар иж-роия кўмитаси ИИБдан ми-лиция кичик сержанти Эр-кин Тиллаев ўзининг «Ральф» лақабли ити билан кўтарил-ди. У 296 балл тўплади. Ик-кинчи ва учинчи ўринлар-ни ҳам Тошкент шаҳар иж-

роия кўмитаси ИИБ хо-димлари — милиция кичик сержантлари Шухрат Со-тиволдиев ўзининг «Хорд» лақабли ити билан, Павел Битюк «Цезарь» лақабли ити билан эгаллашди.

Ғолибларга жумҳурият ИИБ кўчма кубоги, мақтов қоғозлари, пул мукофот-лари тақдим этилди.

Суратларда: Мусобақа ҳа-камлари — милиция капи-танлари Борис Якушкин ва Алексей Ардашев; синов тў-сиқларидадан ўтиш; мусобақа ғолиби Тошкент шаҳар иж-роия кўмитаси ИИБ ходи-ми милиция катта сержанти Эркин Тиллаев.

Ҳабибулла ШОДИЕВ
олган суратлар.



ЖИГАРИСТОН: ФАЛОКАТ ВА ЖАСОРАТ




Ангрен шаҳри яқинидаги кечагина кўпчиликка номаълум Жигаристон қўриғи ноини оғриғни сезиши мумкин бўлган инсонлар қалбига муҳрлаб қўйган фалокат мана шу тепаликлардан тупроқ кўчиши туфайли юз берган. Тупроқ остида одамлар қолди, турар-жойлар қолди. Яна бир нарса қолди. Бу — шаҳид кетганларнинг тириклар юрагида мангу қолган хотираси.



Бугун кутилмаган ҳодиса қурбони бўлганлар номини хотирлаш учун бу ерга нафақат марҳумларнинг яқинлари, қаринош-уруғлари, балки жумҳуриятнинг турли чеккаларидан келаётган инсонлар оқими узилмаб-

тир. Оналарнинг серажи чехраларидаги дард, эркакларнинг юзани хотиржам қиёфаларидаги ўйчанлик кўп нарсалардан сўйлаб турибди.

Олдин ҳам хабар берганимиздек, фалокат бутун халқимизни қўзгалтириб қўйди. Юртимизда ҳали оқибат, меҳр-шафқат туйғулари бениҳоя кучли эканлигини мана шу ерда ҳис қилиш мумкин. Дастлабки дақиқаларда ерданга етиб келганлар орасида ҳайдовчилар ҳам бор эдилар. Уларнинг матонатли меҳнати ҳар қанча таҳсинга лойиқ. Қудратли техника рулини вақт билан заррача ҳисоблашмасдан бошқараётган қалби дарё кишилар турли-туман халқ хўжалик юкларини ташиқдалар.



Фалокат мана шу уйни ҳам ямлаб юборишига бир баҳя қолди. Хонадон эгаларини кўчиришга, неча йиллар давомида бошана бўлган қадрдон иморатни бузишга тўғри келди. Яхши ниятда бино тикларди ўзбеклар. Бугун яхши ниятда — хавфдан йироқ қилиш мақсадида бу уйлар бузиламоқда.



«Жигаристон». Бугун бу ном — ҳамкорлик, ҳамдардлик тимсолига айланди. Жумҳуриятнинг барча аҳолиси баҳоли қудрат ердан бермоқда. Ҳозир Жигаристонга олиб борадиган йўлларда транспорт қатнови бир неча қарра ортиб кетди. Уни тартибга солишда, ҳаракат хавфсизлигини таъминлашда ДАН ходимларининг хизмати катта бўлмоқда.

Тошкент вилояти ИИБ ДАНБ ходими милиция кичик сержанти Эрназар Бекмуродов Бухоро вилоятидан ерданга келган, саҳоват эгаларига йўл кўрсатмоқда.

Суратли саҳифани «Поста»нинг махсус мухбирлари Ғайратжон БОЛТАБОВЕВ (матн) ва Ҳабибулла ШОДИЕВлар (суратлар) тайёрлашган.



Жигаристон сари йўл олган минг-минглаб самимий инсонлар панасида сездирмай ўтишга ҳаракат қилаётган бир-иккита эгри ниятли кишилар ҳам бор. Уларнинг шум режаси пучга чиқиши аниқ, чунки сутканинг исталган пайтида кўмакка муҳтож ҳар бир одам қақриғига милиция ходимлари шай туришибди. Ангрен шаҳар ички ишлар бўлими жамоат тартибини сақлаш бўлими бошлиғи милиция капитани Хайрулла Матасимов ана шундай фидойи кишилардан бири. Уни ҳамisha хизмат пайтида, учратиш мумкин.

